

Član 21.

Ovaj Zakon stupa na snagu osmog dana od dana objavljivanja u "Službenom glasniku Unsko-sanskog kantona".

Broj 01-02-1-295/09 Predsjedavajući Skupštine
29. januara 2009. godine Unsko-sanskog kantona
B i h a ć Admir Hadžipašić, dipl. pravnik

27.

Na osnovu člana 16. Zakona o Vladi Unsko-sanskog kantona ("Službeni glasnik Unsko-sanskog kantona", broj 5/08), a u vezi sa članom 131. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj 39/03 i 22/06), na prijedlog Kantonalne uprave civilne zaštite, Vlada Unsko-sanskog kantona, na sjednici održanoj dana 15.12.2008. godine, donosi

**UREDBU
O FORMIRANJU KANTONALNE
MJEŠOVITE SPECIJALIZIRANE
JEDINICE CIVILNE ZAŠTITE**

I. OSNOVNE ODREDBE**Član 1.**

Ovom Uredbom osniva se Kantonalna mješovita specijalizirana jedinica civilne zaštite (u daljem tekstu: specijalizirana jedinica), utvrđuje njen sastav, zadaci, način popune ljudstvom, materijalno-tehničkim sredstvima i opremom, obučavanje, osposobljavanje i način upotrebe te jedinice.

Član 2.

Specijalizirana jedinica namijenjena je za izvršenje složenijih spasilačkih intervencija koje zahtijevaju brzu i efikasnu akciju spašavanja života i zdravlja ljudi i materijalnih dobara od posljedica prirodnih i drugih nesreća i te zadatke izvršava na način predviđen ovom Uredbom.

**II. ORGANIZOVANJE, ZADACI I SASTAV
SPECIJALIZIRANE JEDINICE CIVILNE
ZAŠTITE**

Član 3.

Specijalizirana jedinica organizuje se:

- od dva deminerska tima Federalne uprave civilne zaštite koji svoje poslove kao redovnu djelatnost obavljaju na području Unsko-sanskog kantona;

- od obveznika civilne zaštite koji imaju stručna znanja i vještine potrebne za izvršavanje poslova i zadataka iz nadležnosti ove jedinice.

Član 4.

Specijalizirana jedinica sastavljena je od tri tima, i to:

- 1) Tim za izviđanje, pretrage i pronalaženje ljudi u ruševinama;
- 2) Tim za zaštitu i spašavanje od mina i drugih NUS i gašenje požara;
- 3) Tim za radiološko-hemijsku i biološku zaštitu.

Član 5.

Zadaci specijalizirane jedinice su: izviđanje, pretraživanje, otkrivanje i pronalaženje ljudi u ugroženim i oštećenim objektima, ruševinama, klizištima, lavinama, snježnim nanosima, zaštita i spašavanje ljudi i materijalnih dobara u slučaju industrijskih, šumskih i drugih požara, utvrđivanje i građenje nasipa kod nabujalih voda, odstranjivanje prepreka na cestama i otklanjanje drugih posljedica nesreća, spašavanje ljudi i materijalnih dobara u slučaju saobraćajnih i željezničkih nesreća sa velikim brojem žrtava i povrijeđenih, sanacija posljedica nesreća sa opasnim materijama, prečišćavanje vode, snabdijevanje stanovništva vodom i drugim životnim namirnicama na ugroženom području, radiološko-hemijsko i biološko (u daljem tekstu: RHB) izviđanje, dozimetrijska kontrola i dekontaminacija ljudi i materijalno-tehničkih sredstava (u daljem tekstu: MTS), oprema zemljišta i objekata u slučaju upotrebe nuklearno - hemijskog i biološkog oružja, otkrivanje, obilježavanje, transport i uništavanje neeksplozivnih ubojnih sredstava (u daljem tekstu: NUS), spašavanje unesrećenih u slučaju minske nesreće, učestvovanje u evakuaciji i privremenom smještaju i opskrbi ugroženog stanovništva, podizanje privremenih naselja, raspodjela sredstava pomoći, podrška kantonalnim službama zaštite i spašavanja i zajedno s njima učestvuje u provođenju poslova zaštite i spašavanja, vrši i druge poslove zaštite i spašavanja u skladu sa svojim kadrovskim, materijalno-tehničkim mogućnostima i osposobljenošću.

III. LIČNA I MATERIJALNA FORMACIJA, POPUNA LJUDSTVOM I MATERIJALNO-TEHNIČKIM SREDSTVIMA SPECIJALIZIRANE JEDINICE

Član 6.

Sastav specijalizirane jedinice utvrđuje se ličnom i materijalnom formacijom. Lična i materijalna formacija jedinice za hitne intervencije utvrđuje se u skladu sa članom 43. Pravilnika o organizovanju jedinica civilne zaštite, njihovim poslovima i načinu rada ("Službene novine Federacije BiH", broj 77/06).

Lična i materijalna formacija specijalizirane jedinice civilne zaštite nalazi se u prilogu ove Uredbe i čini njen sastavni dio.

Član 7.

Popuna specijalizirane jedinice civilne zaštite izvršit će se ljudstvom iz deminerskih timova civilne zaštite i obveznika civilne zaštite koji imaju stručna znanja i vještine potrebne za vršenje poslova i zadataka iz nadležnosti jedinice, a popuna materijalno-tehničkim sredstvima (u daljem tekstu: MTS) u skladu sa Uredbom o načinu davanja i vraćanja materijalnih sredstava uzetih za potrebe civilne zaštite ("Službene novine Federacije BiH", broj 23/04 i 38/06) vršit će se nabavkom i izuzimanjem MTS i opreme od pravnih i fizičkih lica – imaoca MTS.

Nabavka MTS iz stava 1. ovog člana vršit će se prema godišnjem planu opremanja jedinice, koji izrađuje Kantonalna uprava.

IV. PODRUČJE DJELOVANJA SPECIJALIZIRANE JEDINICE I NJENO ANGAŽOVANJE

Član 8.

Specijalizirana jedinica će poslove iz svoje nadležnosti obavljati na cijelom području Unsko-sanskog kantona (u daljem tekstu: Kanton) u svim slučajevima kada organizirane snage zaštite i spašavanja općine – grada, na čijem je području nastala prirodna ili druga nesreća, nisu dovoljne da brzo i efikasno izvrše sve zadatke na zaštiti i spašavanju ugroženih ljudi i materijalnih dobara, a prema ukazanoj potrebi i u aktivnostima pružanja pomoći u nesrećama na drugim područjima Bosne i Hercegovine i u inostranstvu.

Član 9.

Angažovanje specijalizirane jedinice vrši se na zahtjev općinskog štaba civilne zaštite općine – grada u slučajevima proglašenja stanja prirodne i druge nesreće na njihovom području, za vrijeme vježbi, obuke, ratnog stanja, ali i u slučaju neposredne opasnosti od nastanka prirodne i druge nesreće, kada je njeno angažovanje neophodno, bez obzira da li je u općini – gradu proglašeno stanje prirodne ili druge nesreće.

Angažovanje specijalizirane jedinice civilne zaštite na drugim područjima Bosne i Hercegovine vrši se na zahtjev Federalnog štaba civilne zaštite, a angažovanje jedinice u inostranstvu na zahtjev nadležnog organa Bosne i Hercegovine u skladu sa međunarodnim konvencijama i bilateralnim sporazumima o saradnji u zaštiti od prirodnih i drugih nesreća koje je Bosna i Hercegovina ratificirala.

O angažovanju jedinice u uslovima iz stava 2. ovog člana odlučuje Kantonalni štab civilne zaštite (u daljem tekstu: Kantonalni štab).

Član 10.

Angažiranje specijalizirane jedinice na zaštiti i spašavanju u uslovima iz člana 9. stav 1. ove Uredbe vrši Kantonalni štab na zahtjev Kantonalne uprave. Taj zahtjev se podnosi kada Kantonalna uprava primi zahtjev za angažovanje jedinice od općinskog štaba civilne zaštite na čijem području je nastala prirodna ili druga nesreća.

Član 11.

U slučaju hitne potrebe, angažovanje specijalizirane jedinice civilne zaštite može narediti i komandant Kantonalnog štaba ako se sjednica Štaba ne može odmah sazvati. U slučaju da je komandant Štaba odsutan ili iz drugih razloga spriječen da vrši svoju dužnost, naređenje za angažovanje jedinice izdaje načelnik Kantonalnog štaba.

O angažovanju specijalizirane jedinice pod uslovima iz stava 1. ovog člana, komandant, odnosno načelnik Štaba, dužan je na prvoj sjednici upoznati Kantonalni štab o razlozima angažovanja specijalizirane jedinice.

Naredba o angažovanju specijalizirane jedinice sadrži: naziv jedinice ili tima iz njenog sastava koji se angažuje, područje na kojem će djelovati, vrijeme angažovanja i obaveze Kantonalne uprave u vezi realizacije naredbe Štaba.

Član 12.

Komandovanje specijaliziranom jedinicom u svim slučajevima njenog angažovanja po naredbi Kantonalnog štaba vrši komandir jedinice, a komandovanje s nižim organizacionim dijelovima jedinice (timovima) vrše vođe tih jedinica (timova).

Poslove iz svoje nadležnosti specijalizirana jedinica vrši samostalno, a po potrebi može biti angažovana i kao pomoć odgovarajućim kantonalnim službama zaštite i spašavanja koje se angažuju na istom području.

U slučajevima kada se specijalizirana jedinica angažuje na području općine – grada na čijem području je nastala prirodna ili druga nesreća, jedinica izvršava zadatke iz svoje nadležnosti na području koje odredi štab civilne zaštite koji na tom području rukovodi akcijama zaštite i spašavanja i postupa po naredbama tog štaba.

V. ZADACI KANTONALNE UPRAVE CIVILNE ZAŠTITE**Član 13.**

Kantonalna uprava civilne zaštite vrši sve poslove koji se odnose na formiranje i funkcionisanje specijalizirane jedinice, i to:

- 1) predlaže ličnu i materijalnu formaciju jedinice;
- 2) vrši popunu jedinice ljudstvom i MTS u skladu sa ličnom i materijalnom formacijom jedinice;
- 3) vrši planiranje i nabavku opreme i MTS potrebnih za rad jedinice;
- 4) planira, organizira i izvodi obuku i osposobljavanje jedinice i vrši pripreme za njeno angažovanje;
- 5) planira i obezbjeđuje finansijska sredstva potrebna za naknade i druge troškove kada jedinica bude angažovana na vršenju zadataka iz svoje nadležnosti;
- 6) vrši i sve druge poslove koji se odnose na organizovanje, pripremanje i upotrebu specijalizirane jedinice.

VI. OBUČAVANJE I OSPOSOBLJAVANJE SPECIJALIZIRANE JEDINICE**Član 14.**

Obučavanje i osposobljavanje pripadnika specijalizirane jedinice za vršenje poslova iz njene nadležnosti provodi se po nastavnom planu

i programu obuke koji donosi direktor Federalne uprave civilne zaštite.

Pored zajedničke obuke, komandir jedinice i vođe timova obučavaju se i kroz specijalističke kurseve koji se organizuju svake dvije godine.

VII. FINANSIRANJE SPECIJALIZIRANE JEDINICE**Član 15.**

Finansijska sredstva potrebna za obavljanje poslova iz nadležnosti specijalizirane jedinice planiraju se i obezbjeđuju u Budžetu Unsko-sanskog kantona.

Finansijska sredstva po osnovu člana 180. Zakona o zaštiti i spašavanju za potrebe finansiranja specijalizirane jedinice planiraju se u skladu sa Odlukom o uvjetima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća ("Službene novine Federacije BiH", broj 46/05 i 61/07).

VIII. PRELAZNE I ZAVRŠNE ODREDBE**Član 16.**

Ova Uredba stupa na snagu danom donošenja i objavit će se u "Službenom glasniku Unsko-sanskog kantona".

Broj 03-017-1041/2008
15. decembra 2008. godine
B i h a ć

Premijer Kantona
Šemsudin Dedić

28.

Na osnovu člana 16. Zakona o Vladi Unsko-sanskog kantona ("Službeni glasnik Unsko-sanskog kantona", broj 5/08), a u vezi sa članom 27. tačka 6. i članom 106. stav 1. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije Bosne i Hercegovine", broj 39/03 i 22/06), Vlada Unsko-sanskog kantona, na sjednici održanoj dana 15.12.2008. godine, donosi